

Nunatsinni innarluutillit ilinniartitaanikkut suliffeqarnikkullu atugaannik misissuinerup kingusinnerpaamik UPA 2020-mi saqqummiunneqarnissaanik Inatsisartut aalajangiiffigissaattut siunnersuut. Ilinniarfiusinnaasut suliffiusinnaasutullu piukkunnaatillit qanoq tapersorneqartiginerannik aammalu inunnit pineqartunit inuiaqatigiinnillu pisariaqarneratut atorneqartiginerannik erseqqinnerusumik qulaajaanermik misissuineq imaqassaaq, soorluttaaq misissuineq innarluutillit ilinniartitaanerannut suliffeqarneranullu tunngasumik siunissami ilisimasaqalernissamut qulakkeerinnittumik aalajangiisoqarneranik malitseqartinneqassasoq

(Inatsisartunut ilaasortamit, Aqqa Samuelsen, Inuit Ataqtigiit, saqqummiunneqartoq)

pillugu

Ilaqtariinnermut Peqqissutsimullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini makku ilaasortarai:

Inatsisartunut ilaasortaq Laura Táunâjik, Siumut, siulittaasoq
Inatsisartunut ilaasortaq Stine Egede, Inuit Ataqtigiit, siulittaasup tullia
Inatsisartunut ilaasortaq Karl-Kristian Kruse, Siumut
Inatsisartunut ilaasortaq Nivi Olsen, Demokraatit
Inatsisartunut ilaasortaq Malene Vahl Rasmussen, Demokraatit
Inatsisartunut ilaasortaq Mikivuk Thomassen, Inuit Ataqtigiit
Inatsisartunut ilaasortaq Aqqa Samuelsen, Inuit Ataqtigiit

UPA 2019-imi ulloq 3. april 2019-imi siullermeerinninnerup kingorna ataatsimiititaliap siunnersuut sukumiisumik misissorpaa.

Siunnersuutip imarisaa siunertaalu

Kalaallit Nunaanni inuit innarluutillit ilinniartitaanikkut suliffeqarnikkullu atugaat pillugit misissuinerup kingusinnerpaamik UPA 2020-imi Naalakkersuisut saqqummiussaqaarnissaat siunnersuutip tapersorneqarneratigut siunnersuuteqartup kissaatigaa. Inunnut innarluutilinnut ilinniartitaanikkut suliffeqarnikkullu atugaannut tunngatillugu siumut

isigisumik ilisimasanik tunngaveqarnissap qulakkeerneqarnissaanut misissuinerup aalajangiinermik malitseqartinneqarnissaata inuiaqatigiillu ataatsimut isigalugit ilinniartitaanikkut suliffittaarnissaminnullu ilimanaatillit qanoq tapersorsorneqassanersut inuillu pineqartut saniatigut pisariaqarfiaqatigut atorveqarnersut pillugu sukumiinerusumik qulaajaasoqarnissaa pillugu misissuisoqassasoq siunnersuuteqartup oqaatigaa.

Siunnersuutip Inatsisartunit siullermeerneqarnera

Inuit innarluutillit naatsorsorneqarnerat pillugu, suliffeqarnerat ilinniagaqarnerallu ilanngullugit kommunit nalunaarsuisarnerisa ataatsimut ingerlanneqalernissat siunertaralugu Naalackersuisut suliaq aallartereersimagaat tunngavilersuutigalugu Partiit amerlanerussuteqarluartut siunnersuut ataatsimiititaliamut suliassanngortippaat, ikinnerussuteqartulli siunnersuut itigartikkaat.

Pineqartumi Naalackersuisut suliamik aallartitsereersimanerat tunngavigalugu Inuit Ataqtigiiit siullermeerinninnermi ima allannguutissatut siunnersuummik saqqummiussaqaqput:

Naalackersuisut suliassamik aallartitaminni, kommunit inuit innarluutillit pillugit naatsorsuineri inuillu innarluutillit ilinniartitaanerannut suliffeqarnerannullu naatsorsuinerit ataatsimoortilernissaat siunertaralugu aammalu suliaminni ilinniarfusinnaasutut suliffiusinnaasutullu piukkunnaatillit qanoq tapersorsorneqartiginerannik aammalu inunnit pineqartunit inuiaqatigiinnillu pisariaqarneratut atorveqartiginerannik erseqqinnerusumik qulaajaanermik misissuineq imaqartissagaattaaq.

2019-p 2020-illu ingerlanerini inuit innarluutillit suliffeqartut suliffeqanngitsullu aammalu ilinniagaqarsimanerisa qaffasissusaat amerlassusaallu pillugit naatsorsuutininik saqqummiussinissaq tunngavilersuutigalugit siunnersuut Naalackersuisut itigartippaa.

Ataatsimiititaliap siunnersuummik suliarinninnera

Inuit innarluutillit qanoq amerlatigisut suliffeqarnesut aamma qanoq amerlatigut ilinniakkaminnik naammassinnissimanersut ingerlatsinersulluunniit Naalackersuisut qulaajaaviginiarpasuk - Inuit innarluutillit ilinniartitaanikkut suliffeqarnikkullu atugaannut tunngatillugu siumut isigisumik ilisimasanik tunngaveqarluni qulakkeerinissaq pillugu misissuinissamik malitseqartinneqarnissaanik aalajangerup saniatigut, inunnut innarluutilinnut qanoq ilinniartitaanikkut suliffeqalernissaminnullu piukkunnaateqartut pisariaqarfiaqatigut tapersorsorneqarnissaat atorveqarnissaallu ilassutigalugu qulaajarneqarsimammat, tamanna siunnersuuteqartup kissaatigisaanit annertunersoq aallarniutigalugu ataatsimiititaliamit maluginiarneqarpoq.

Pineqartumi malittarisassat atuuttut tunngavigalugit inuit annertuumik innarluutillit

suliffissaqarniarnerat ilinniartitaanerallu pillugit paasissutissat kommuninit pigineqareersimagunartunik Naalakkersusut qulaajaanissaat ingerlanneqassaaq. 2019-p 2020-illu ingerlanerini inuit innarluutillit sulliffissaqartitsiniarnerup iluani avataanilu kiisalu inuit innarluutillit akornanni ilinniarsimassutsip qaffasissusaa pillugit naatsorsuutit saqqummiunneqassasut ilanngullugu Naalakkersuisut itisilerpaat. Paasissutissat piviusut taakku aamma kommunit nalunaarsugaat kingusinnerusukkut misissuinermut atorneqarsinnaasutut pitsaassusiliisinnaasutullu Naalakkersuisunit isumaqarfigineqarput. Kingusinnerusukkut misissuineq taamaattoq sunik imaqassanersoq sunillu siunertaqassanersoq Naalakkersuisut akissuteqaatiminni oqaatiginngilaat. Pineqartumi Naalakkersuisut suliariniarlugu eqqarsaatigisaat, siunnersuuteqartup isumaanut akerliusumik paasiniaaqqissaanernut misissueqqinnissanullu tunngavissiinnigilaq.

Meeqqat immikkut pisariaqartitsisut meeqqat atuarfianni soraarummeertarnernut tamakkiisumik pisinnaatitaaffeqarnissaa eqqumaffigineqassasooq siunnersuummik siullermeerinermi Naalakkersuinikkut erseqqissaatigineqartoq ataatsimiititaliamit maluginiarneqarpoq.

Inunnut annertuumik innarluutilinnut ikiorsiisarneq pillugu Inatsisartut peqqussutaanni pineqartunut sanilliullugu inuit innarluutillit amerlanerusut annertunerusumillu innarluutillit UPA 2019-imi inunnut innarluutilinnut tapersersuisarneq pillugu inatsisissatut siunnersuut saqqummiunneqartoq ataatsimiititaliamit maluginiarneqarpoq.

Misissuinerit siumut isigisut, qanorluunniit taakku iluseqaraluarpata inuit innarluutillit sapinngisamik amerlasuut UPA 2019-imi suliarinninnermi inatsisissatut siunnersuummut ilanngunneqarsimanissaat ataatsimiititaliamit kissaatigineqarpoq.

Inuit Ataqtigiit allannguutissatut siunnersuutaat

Inuit Ataqtigiit allannguutissatut siunnersuutaat siunnersuutaqaartumut atatillugu saqqummiunneqarsimanissaa Naalakkersuisullu suliasatut pilersaarutaata kingunerigaa ilimanartoq ataatsimiititaliaq nalilivoq.

Inuit Ataqtigiit allannguutissatut siunnersuutaat ima oqaasertaqarpoq:

”Naalakkersuisut suliasamik aallartitaminni, kommunit inuit innarluutillit pillugit naatsorsuineri inuillu innarluutillit ilinniartitaanerannut suliffeqarnerannullu naatsorsuinerit ataatsimoortilernissaat siunertaralugu aammalu suliaminni ilinniarfiusinnaasutut suliffiusinnaasutullu piukkunnaatillit qanoq tapersorneqartiginerannik aammalu inunnit pineqartunit inuiaqatigiinnillu pisariaqarneratut atorneqartiginerannik erseqqinnerusumik qulaajaanermik misissuineq imaqtissagaattaaq.”

Paasissutissiiutigaluni – oqaloqatigiinnertalimmik ataatsimiinneq ulloq 28. maj 2019

Ataatsimiititaliap ulloq 28. maj 2019 Peqqissutsimut, Isumaginninnermut Inatsisinillu Atuutsitsinnermut Naalakkersuisoq aamma Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq ataatsimoortillugit paasissutissiiutigaluni oqaloqatigiinnertalimmik ataatsimeeqatigai. Taamatuttaaq Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamut ilaasortat ataatsimiinnissamut qaaqquneqarput. Ataatsimiinneq tamanut pissarsiaqarfiuvoq, pingaartumillu inuit innarluutilit atuarfinni ilinniagaqarfinnilu pissutsit aammalu sunngiffimmik susassaqtitsinnermilu periarfissaat tamatumunnga ilanngullugu meeqperiveqarnermut tunngasuni atugaat pillugit annertunerusumik ataqatigiissaakkamik ilisimasaqarnerulernissaq paasissutissiiinerulernissarlu pisariaqartinneqarput, taamaaliornikkut naalakkersuinikkut suliaqarnermi ugartorneqartut ineriartortitsinnermi ineriartuutaasumik sammisassaqtitsiniarnermilu periarfissat siunnerfeqarnerulersinnaaqullugit aaqqissuusaanerulersinnaaqullugillu. Pineqartumi naalakkersuinikkut oqaloqatigiiffiusumik ataatsimiinnermi Naalakkersuisut akornanni aamma Naalakkersuisoqarfiit akimorlugit sulinnermi nassuerutigineqarpoq naalakkersuinikkut anguniakkat takorluukkallu naammassineqarnissaat siunertaralugu inunnut innarluutilinnut tunngatillugu suleqatigiinnermi pissutsit nukittorsarneqarnissaat pisariaqartinneqarpoq inissaqartinneqartariaqarlunilu, inuit immikkuullarissut taakku piginnaasaasa atugaasalu ineriartortinneqarnerat uummarissarneqartariaqarluni. Kiisalu ataatsimiinnermi paasinarsivoq atuarfimmi atuartut immikkut atuartinneqartut pillugit ilisimasat maanna katersarineqareersut inunnut innarluutilinnut nuunneqaannarsinnaangitsut. Immikkut atuartinneqartut amerlanersaat atuartunit innarluutilinnit allaanerupput, soorluttaaq immikkut atuartinneqartariaqanngitsunik atuarfimmi atuartunik innarluutilinnik arlalinnik peqartoq, tassa taakku innarluutaat timaannut immaqqa tunngammata ilikkarsinnaassusiannut tunnganatik.

Inunnut innarluutilinnut tapersersuineq pillugu siunnersuummik (UPA 2019/205) ataatsimiititaliap suliaqarnermini inuit innarluuteqartut pillugit ataatsimoortumik Naalakkersuisoqarfiillu akimorlugit isiginneriaaseqarnissap pingaaruteqarnera ilanngullugu oqaatigaa, inunnullu innarluutilinnut tunngatillugu pigiliussimasanik isumalioriaaseqarnerup siamasissumik atorineqartup ullumikkut amerlasuutigut ilisarnaasiutaaginnersimasup atorineqannginnissaa.

Siunnersuummut Naalakkersuisut suliarissallugu isumaliutigisaannut kiisalu allannguutissatut siunnersuummut saqqummiunneqartumut tunngatillugu ataatsimut isigalugu Ataatsimiititaliap oqaatigissavaa:

Suliaq Naalakkersuisut suliassaqarfimmi aallartissimasaat ataatsimiititaliamit maluginiarneqarpoq, peqatigisaanilli isumaqarluni siunnerfeqarnerusumik

piukkunnarnerusumillu sulisoqartariaqartoq. Aammattaaq ataatsimiititaliamit maluginiarneqarpoq Inuit Ataqatigiit allannguutissatut siunnersuutaat allannguutissatut siunnersuutininik ilusiliinissamut piumasagaatinik naammassinninngitsoq suliasaqarfimmilu oqaasertalersueriaatsinut nalinginnaasunut naapertuutinngitsoq. Allannguutissatulli siunnersuutip Inuit Ataqatigiinnit saqqummiunneqartup imarisai, suliamut Naalakkersuisunit aallartinneqareersumut attuumassuteqarmat ataatsimiititaliamit taperserneqarpoq, tamatumalu kingunerisaanik ataatsimiititaliaq allannguutissatut siunnersuummik erseqqissateqarfiusumik matuminnga ataatsimiititaliaq saqqummiussivoq:

Kommunit inunnik innarluutilinnik kiisalu inunnik innarluutilinnik ilinniagaqartunik suliffeqartunillu kisitsinerata suliami aallareriikkaminni ilanngunneqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaaliornikkut taakku ataatsimut katersorneqarsinnaaqqullugit, soorluttaaq ilinniarfiit suliffeqarfiillu piukkunnaatillit tapiissutinik qanoq amerlatigisunik pissarsisarnerat aammalu inuit pineqartut pisariaqartitsineq naapertorlugu atorneqarnersut pillugit paasissutissat qulaajaanermi nassuiaatigissagaat.

Malittarisassat nassuiaariaatsillu atuuttut aallaavigalugit kommunit kisitsinerata naatsorsuineratalu kissaatigineqartup assigiiaartumik nassuiarluakkamillu pinissaa qulakkeerneqassammat ataatsimiititaliamit erseqqissaatigineqassaaq, taamaaliornikkut naalakkersuinikkut suliniuteqarnerup ingerlaqqinnerani piukkunnartunik paasissutissanillu tunngaveqartumik tunngavissaqartoqarsinnaaqqullugu.

Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinneqarnissaanut aningaasatigut allaffissornikkullu kingunerisassai siunnersuummut tunngavilersuutininut allanneqassasut.

Siunnersuutip piviusunngortinneqarnerani aningaasatigut kingunerisassai siunnersuummi allanneqarsimasunut naapertuuttut, taamaalilluni saqqummiunneqarnissaanut suliaqarnermut pineqartumullu misissuinissamut 500.000 kr.-inik aningaasartaqassasoq ataatsimiititaliamit maluginiarneqarpoq.

Ataatsimiititaliap inassuteqaatai

Tamanna tunngavigalugu ataatsimiititaliap allannguutissatut siunnersuutaat qulaani taaneqartoq akuerineqassasoq, siunnersuutillu allat itigartinneqassasut Ilaqtariinnermut Peqqissutsimullu Ataatsimiititaliap isumaqatigiittup inassutigaa.

Taama oqaaseqarluni isumaliutissiisumilu allassimasunut paasinnilluni ataatsimiititaliap siunnersuut aappassaaniigassanngortippaa.




Laura Táunâjik
Siulittaasoq



Stine Egede
Siulittaasup tullia




Karl-Kristian Kruse



Nivi Olsen



Malene Vahl Rasmussen



Mikivsuk Thomassen



Aqqa Samuelson